

明張文忠公全集

明張文忠公全集一

奏疏九

請罷織造內臣對

工部覆禮科左給事中顧九思工科都給事中王道成等疏
請罷蘇松及應天織造取回原差內臣上遣文書官傳諭云
御用袍服緊急織造且未可罷若如部議取回內臣收屬撫
按有司則織造不精誰任其責且見有錢糧不必加派先生
每擬票來臣與同官二臣持工部疏入見上於便殿奏云近
日蘇松等處水災重大據撫按官奏報及臣等所聞百姓困
苦流離朝不謀夕有羣聚劫奪者地方錢糧委難措處且自
前年星變時親奉明旨停止織造着孫隆回京至今尙未完

報是詔令不信而德澤不宣也臣等謂宜從該部所請以彰皇上敬天恤民至意民惟邦本願少加聖心上曰朕未嘗不愛惜百姓但彼處織造不久當完遠不過來春爾臣對言皇上德意臣民無不欣仰卽孫隆在彼亦能仰體聖心安靜行事但地方多一事則有一事之擾寬一分則受一分之賜今彼中織完十末四五物料錢糧尙有未盡徵完者災地疲民不堪催督願皇上且取回孫隆其應天被災稍輕許坤仍舊可也上乃許之曰近降去花樣皆御前發出銀兩並不加派擾民此一件還着織完回京其餘則皆停罷可也臣等頓首曰幸甚蓋是時宮中自大婚以來應受賜者皆籍記以待又

當供奉慈甯歲幣益不足盡仰東南織造上心亦難之乃從中發銀五千兩畀孫隆約用盡更請一不以煩百姓外廷莫得知也故上指此爲言因以部疏授臣云先生將去票來又顧臣等云君臣一體今有司通不奉行百姓安得受惠臣對言誠如聖諭臣等今日亦無非推廣皇上德意而已願皇上重惜民生保固邦本則百萬生靈仰戴至仁實社稷靈長之慶因叩頭出次日奉聖旨蘇松地方災傷重大孫隆着查近降花樣御前發去銀兩應織袍服上緊湊織完日即便回京其以前織完的照數解進未完的都着停止物料等項准作歲造段疋支用撫按官還查數明白具奏許坤且着照舊

請酌減增造段疋疏

伏蒙發下工科都給事中王道成等請酌減織造段疋一本
臣等查得先該承運庫太監孔成等以賞賜夷人段疋缺乏
題請行南京蘇松浙江等處增織於內又將上用袍服等項
併請織造共該七萬三千疋奉聖旨工部知道今科臣王道
成等因見東南地方災傷重大民力罷敝恐加派擾民故有
此奏臣等看得歲造段疋原有定額祖宗朝計一歲所造賞
賚諸費尙有贏餘至嘉靖年間賞賚無時每稱缺乏乃行文
於該地方增織謂之急缺段疋然亦間一行之非可爲常例
者也今查萬曆三年該庫已稱缺乏請於歲造之外添織九

萬有餘其時以大婚禮重賞賜浩繁該部不得已欽遵明旨設法措處然聞之各地方庫藏搜括已盡經今四年方得織完而添織之旨又下計該庫所開數目度其所費非得銀四五十萬不能辦此索之庫藏則庫藏已竭加派小民則民力已疲況今歲南直隸浙江一帶皆有水災頃蒙特恩破格蠲賑又取回織造太監罷困之民方得更生乃又重復加派子惠之恩未洽誅求之令卽施非聖慈所以愛養元元培植邦本之意也民窮財盡賦重役繁將來隱憂誠有不可勝諱者科臣所奏宜畱聖心臣等看得該庫偶因三衛夷人賞賜段疋缺少虎豹一樣服色及近年北虜俺答款貢歲增賞資溢

於舊數故題請添織以上二項委不可已至於上供御用等項則近年南京太監許坤蘇杭太監孫隆織進御前者已自足用不必又取辦於歲造矣臣等愚見伏乞聖明再諭該庫查北虜俺答一宗賞賜一歲約該幾何及三衛夷人虎豹服色缺少幾何照數行該地方添織卽作歲造之數其餘皆可停止惟冀俯從科臣之言一概減半織造其支費銀兩勅下戶工二部酌處免復加派小民庶近日蠲恤之旨不爲虛文罷極之民少得蘇息也臣等職在帷幄蒙皇上心膺之寄豈不知國用浩繁事在難已敢故爲節省之言以沽違拂之譽但事關邦本不得不爲深長之慮伏望聖慈宥其愚昧裁酌

施行奉聖旨東南地方既有災傷這段正等項准減半織造其支費銀兩着戶工二部措處毋得加派小民欽此

服闋謝降勅召見賜衣帶金器疏

先准吏部咨欽奉聖諭問臣服制幾時滿着吏部上本起復該部回稱臣服制扣至萬厯七年十二月二十四日期滿禮當從吉等因備咨到臣遵奉間至本月二十三日仰荷天恩特降手勅諭元輔張少師先生在京守制忠孝兩全今當服滿朕心忻慰特賜玉帶一條大紅坐蟒蟒衣各一襲金執壺一把金臺盞一副用示眷知念五曰見朝畢候朕御平臺召見以後朝參經筵俱照舊行先生欽承之故諭該文書官太

監孫熾恭捧到臣私寓臣謹焚香望闕盥手捧讀叩頭祇領
訖伏念臣猥以庸虛特蒙眷遇曩邁家嚴之變將匍匐以言
奔顧惟慰勉之堅屢籲號而莫遂繼荷聖慈之曲軫敢煩睿
思以折衷許臣謝常祿以在公容臣襄大事而歸里自違邱
壠趨覲闕廷入則荷橐持籌遵墨綬之往制出乃寢苦枕塊
守苴經之常經旣獲承聖主之倚毗兼克盡匹夫之懇悃斯
蓋我皇上乾坤幬載父母愛憐酌權宜於禮典之中垂體恤
於使令之外鏤鐫識感銜結難酬惟茲隙駟之易馳倏爾祥
琴之在御先王之制不敢踰雖勉循禪祔之文人子之心不
能忘實倍切居諸之感乃荷宸衷俯記降清問於銓曹復蒙

綸札傳宣接威顏於中禁祇佩袞辭之藹郁重永朋錫之駢
蕃奩出壺觴驚麟裏黃金之質衣加輦帶羨紅光白璧之珍
更令旣毀之殘軀還被斯皇之寵飾捧而心醉服以魂搖昔
名臣若榮溥攷賢之輩際盛世在永宣順化之間固常變禮
從時並荷先朝之知遇未聞殊恩異數有如今日之遭逢者
也臣敢不益攄丹悃仰答隆施倘筋力之未疲遠道甯忘於
驅策如髮膚之可效微生何愛於捐糜謹欽遵聖諭於二十
五日廷見後卽趨詣平臺恭候召見誠不勝激切感戴之至

召見平臺記事

欽奉勅諭召見於平臺致詞云臣前奉欽依在京守制服滿

朝見奉面諭先生全忠全孝萬古留名臣奏臣蒙皇上天恩
委曲體悉故得以少盡臣子之情不勝感戴叩頭稱謝又奏
昨蒙聖恩特降手勅恩賚殊常尤不勝感戴叩頭謝畢又奏
昨奉勅諭着臣以後照舊朝參臣卽當欽遵但年前數日尙
在三年之內餘哀未忘仍望皇上俯容再寬數日免令朝參
陪祀候元旦慶賀後照舊朝參供職上說先生元旦出來也
罷臣叩頭承旨上又說與先生酒飯喫臣叩頭謝又奏臣在
制中屢荷兩宮聖母慈恩賜賚稠疊今服滿欲詣各宮門外
叩頭稱謝未敢擅便請旨上說是着張宏引進臣叩頭退隨
詣慈慶宮外叩頭蒙仁聖皇太后遣中使傳諭云先生忠孝

兩全了宜益盡心輔佐賜銀五十兩紵絲四表裏隨詣慈甯宮門外叩頭蒙慈聖皇太后着引伴太監張宏傳諭云皇帝冲年凡事多賴先生輔佐天下太平今服制已滿忠孝都全了宜益盡心處置國事特賜膳九品金執壺一把金臺盞一副金鑲牙筯一雙銀五十兩彩段四表裏葷素食八盒甜食四盒酒十瓶命太監張宏遞酒三盃管待

辭免恩命疏

准吏部咨爲欽奉聖諭事查得節奉勅諭朕大婚禮成內閣輔臣忠勞茂著宜加特恩元輔張居正受先帝付託盡忠輔導保護啟迪勲猷獨茂宜加殊禮以答元功但元輔以守制

懇辭暫從其請候制滿之日該部奏請加恩如勅奉行今本
官服制已滿謹遵勅諭題請加恩等因奉聖旨朕元輔社稷
重臣受先帝顧託翊戴朕躬以及大婚弼成治理勲績隆茂
着加太傅歲加祿米一百石原廕武職伊男陞一級世襲着
南鎮撫司僉書管事用副朕酬獎元功至意欽遵備咨到臣
臣聞命驚惶拊躬局促仰惟皇上鴻仁下逮駿惠旁敷往因
嘉禮之成肆舉叙勞之典以臣叨居首弼加惠獨先念臣方
在宅憂懸賞以待茲允部臣之請渙頒追錄之恩三錫殊榮
一朝並至既已奉有成命詎宜仰瀆宸嚴但臣自揣疎庸誤
承眷遇一從受事以至于今每自省循諸所蒙被豈獨近代

臣人之所稀覯抑亦在昔載記之所罕聞卽如頃者服制未
除預垂清問迄于祥禪甫屆遄降溫綸袞辭塵十札之褒珍
貺踰百朋之重黃金白璧炫耀門庭錦綺華章充溢筐篚臣
伏思惟盆盎之器不啻盈矣鼯鼠之腹亦旣飽矣及今克自
抑畏庶幾獲免傾危而浹旬之間豐施薦及越歲之後異命
重申注之已盈而不虞其將覆噉之過飽而不慮其難容在
輿論爲未孚尤天道之所忌此臣所以夙夜匪甯凌兢罔措
者也伏望聖慈鑒臣素悃俾仍舊貫特寢新恩庶愚分獲安
幸道顛隳之咎微軀未隕得紓銜結之忠臣誠不勝戰兢跼
踖懇切俟命之至奉聖旨卿保迪朕躬夙夜匪懈輔宣化理

張文忠公全集
茂著成功眷德酬勲宜從優典朕體卿謙讓至情今次所頒
恩數欲卿安受視先朝施及元臣故事已自不同朕心方以
爲歉卿豈可復行遜避宜勉遵成命以慰朕懷所辭不允吏
部知道

再辭恩命疏

昨臣以蒙恩殊常具奏辭免該文書官姚秀送本到閣口傳
天語着同官二臣擬票溫旨勉臣遵奉不必再辭隨奉聖旨
卿保迪朕躬夙夜匪懈輔宣化理茂著成功眷德酬勲宜從
優典朕體卿謙讓至情今次所頒恩數欲卿安受視先朝施
及元臣故事已自不同朕心方以爲歉卿豈可復行遜避宜

勉遵成命以慰朕懷所辭不允吏部知道欽此仰惟聖眷優
崇宸綸藹郁敢不祇若用彰寵榮但臣自以蒙被過隆難於
報答涯分久溢恐致顛危故屢次瀆陳非敢矯飾誠省躬揣
分有萬萬不能自安者也今奉聖諭諄切又該同官二臣咸
導臣以將順誠臣以抗違臣竊伏思惟俯自斟酌因憶前年
恭侍皇上日講曾奉面諭先生功大朕無可爲酬只是看顧
先生子孫便了臣每念及此輒爲涕零夫施及於已身者其
恩猶淺施及於子孫者其恩爲深戴德於一時者其報有盡
戴德於後世者其報無窮今蒙聖恩憐念臣男擢之衛司延
以世賞藐焉弱息荷此殊榮斯蓋前諭所謂看顧臣子孫倦

倦之意也臣不勝感激不勝頂戴謹拜手祇領仍囑臣後嗣
世效犬馬仰報生成惟是三公崇階以待耆碩在本朝文職
咸不敢居萬鍾厚祿以賜勲親臣昔已蒙恩豈宜重冒惟此
二項殊典揣已終不敢當伏望聖慈俯鑒臣愚准臣量受臣
男陞廕其太傅祿米之加俯容辭免庶橫恩不致於濫及微
分亦得以少安履厚戴高不敢忘報臣干冒天威不勝戰慄
隕越之至奉聖旨卿功在社稷不惟朕所眷知亦中外臣民
所共聞見進秩加恩於禮匪過乃又固辭不已朕心益用弗
甯今諒卿惓惓誠特准辭免太傅以成卿勞謙廉讓之美其餘
宜勉遵成命慎毋再辭吏部知道